

# 'Melayu boleh dijajah semula jika tiada ilmu'

BH 12 APR 2001

KUALA LUMPUR, Rabu - Datuk Seri Dr Mahathir Mohamad mengingatkan orang Melayu, terutama generasi muda, mereka boleh dijajah semula jika tidak mempunyai ilmu yang diperlukan bagi mempertahankan maruah dan kemerdekaan negara.

Perdana Menteri berkata, kegagalan orang Melayu berbuat demikian boleh menyebabkan Malaysia kembali dijajah serta mungkin mengambil masa 400 hingga 500 tahun lagi untuk kembali mencapai kemerdekaan.

"Orang Melayu perlu serius mempersiapkan diri dengan ilmu untuk mempertahankan kemerdekaan ne-

gara serta menempuh cabaran gelombang globalisasi.

"Saya bimbang Malaysia akan dijajah sekali lagi jika orang Melayu tidak serius menuntut ilmu serta mempertahankan kemerdekaan negara," katanya ketika berucap pada majlis makan malam Graduan Bidang Perubatan dan Farmasi dari universiti Mesir, malam ini.

Kira-kira 80 graduan yang pernah menuntut di tujuh universiti di Mesir, termasuk Universiti Kaherah, Universiti Al-Azhar, Universiti Em Shams dan Universiti Iskandariah, antara 1978 hingga 1984 menghadiri majlis itu.

Dr Mahathir kecewa kera-

na kebanyakan generasi muda kini tidak menghargai peluang yang diberikan kepada mereka melanjutkan pelajaran pada peringkat lebih tinggi.

Menurutnya, keadaan itu sangat berbeza dengan generasi zaman awal kemerdekaan yang menghargai peluang melanjutkan pelajaran memandangkan pendidikan yang disediakan ketika itu sangat terhad.

"Pada zaman British dan awal merdeka, tidak banyak peluang belajar disediakan. Oleh itu, apabila mendapat peluang, mereka betul-betul belajar. Walaupun keputusan sekolah tidak begitu baik, ketekunan di univer-

siti menyebabkan mereka berjaya.

"Bagaimanapun, lama kelamaan penghargaan ini merosot. Peluang yang ada tidak dihargai. Kadangkala sudah dapat peluang, tidak digunakan sepenuhnya menyebabkan kita gagal mencapai kemajuan dalam pelajaran," katanya.

Beliau juga kesal dengan sikap segelintir orang Melayu yang beranggapan tidak perlu mempelajari ilmu seperti kejuruteraan dan perubatan atas alasan ia adalah sekular dan tidak dituntut oleh Islam, sedangkan mempelajari ilmu sedemikian sama penting dengan mempelajari agama Islam.

Menurutnya, jika semua orang Melayu mempelajari ilmu agama saja dan tidak mengetahui ilmu lain, masyarakat Islam akan menjadi lemah dan akhirnya bergantung kepada orang lain untuk meneruskan kehidupan mereka.

"Kita berharap apabila mencapai kemerdekaan dan berkuasa, kita dapat menentukan orang Melayu menguasai segala ilmu yang diperlukan untuk umat Islam.

"Sungguh sedih apabila kita dapati pelajar Melayu tidak berminat mempelajari ilmu ini. Ini bermakna kuasa yang ada pada kita dipersia-siakan," katanya.